

راح راح جاسم الغالي

ناح ناح لجله دلالي

آني إمه آني إمه

أني إمك يا ثمر دلالي يا جاسم

بعد عينك دمعي ظل فوق الوجن ساجم

ما إجي إبالي أشوفك عالثرى نايم

إمعفر وماكو كتر من جثتك سالم

تدري يوليدي والله مو بيدي

أبقى بس يمك يبني ياغالي

ما أعوفك وبس أشوفك

ينجلي همي ويعتدل حالي

ليش ليش إموسد الغبرى

ليش ليش مرمي يا حسره

آني إمه آني إمه

سأهت عيني الليالي تحرسك يبني
ساكن إبهديك يروحي وما غبت عني
واتعبت لجلك يجاسم والتهب جفني
حتى اشوفك توفي ليه لو كبر سني

يا بعد عمري يا تعب صبري
انته يالغالي غايتي وذخري
لجلك أتحمل كل تعب وأمل
بيك أشد راسي واحسبك فخري

عين عين ما غفت عنك
عين عين تبجي وي حزنك
آني إمه آني إمه

واكبرت يبني يجاسم وأنّي أتُنظر
أنظرك معرس تزفك كل هلك وأفخر
حولك أعمامك إيفرحه والحسن يحضر
جنتت أمل عيني تنظر يبني هالمنظر

إشمحلي لو إمك بعرسك إتضمك
والأبو يفخر والله لو شافك
بفرحه تنظر له براسه إتقبله
والفرح كله تشوفه بزفافك

غاب غاب كل أمل عندي
غاب غاب كل فرح ولدي
آني إمه آني إمه

من وصلنا كربله قلبي شعر بهم
واعرفت آمالي راحت من إجي محرم
واسمعت لحسين ينادي نصبوا لمخيم
قلت أنا الجاسم فقدته والله بس يعلم

راحت آمالي يبني ياغالي
شلون أرفنك والأجل قرب
خوفي أنظر لك تفحص برجاك
والجسم وسفه بالثرى مترب

آه آه راحت آمالي

آه آه يبني ياغالي

آني إمه آني إمه

خلني أعلق شمعة لك قبلن تفارقني
وخل أبارك لك زفافك هاللي عذبني
مرة شمعة مرة دمعة إشهاالعرس يبني
مدري قلبي إشيحتمل والله يساعدني

أعلق الشمعة وتتطفي بدمعة
وانتحب بعدك يا أعز ناسي
لا تفارقني لا تعذبني
إرحم بحالي وارحم إحساسي

شباب شاب راسي يوليدي
شباب شاب وأنا وش بيدي
آني إمه آني إمه